

# **WARAKA WA MSWADA WA KUFUTA SHERIA YA NEMBO YA TAIFA NAMBA. 1 YA MWAKA 1985 NA SHERIA YA BENDERA YA ZANZIBAR NAMBARI 12 YA MWAKA 2004 NA KUTUNGA SHERIA INAYOWEKA MASHARTI BORA YANAYOHUSIANA NA BENDERA YA ZANZIBAR, NEMBO YA SERIKALI NA WIMBO WA TAIFA WA ZANZIBAR**

## **1.0 MADHUMUNI**

### **Mheshimiwa Spika,**

Madhumuni ya Mswada huu ni kufuta Sheria ya Nembo ya Taifa Namba. 1 ya Mwaka 1985 na Sheria ya Bendera ya Zanzibar Nambari 12 ya Mwaka 2004 na Kutunga Sheria inayoweka masharti bora yanayohusiana na Bendera ya Zanzibar, Nembo ya Serikali na Wimbo wa Taifa wa Zanzibar ili iendane na mahitaji na mazingira ya sasa na baadae. Aidha, kutokana na kutokuwepo kwa Sheria inayosimamia Wimbo wa Taifa wa Zanzibar, Mswada huu pia unaweka nafasi ya kuingiza suala la Wimbo wa Taifa wa Zanzibar na Wimbo wa Maalum wa Mashujaa wa Zanzibar katika Sheria inayosimamia alama za Taifa.

## **2.0 HISTORIA**

### **Mheshimiwa Spika,**

Sheria ya Nembo Namba 1. ya mwaka 1985 inayotumika sasa ilianza kutumika mwaka 1985 baada ya kupitishwa na Baraza la Wawakilishi na kuidhinishwa na Rais wa Zanzibar na Mwenyekiti wa Baraza la Mapinduzi na usimamizi wake uko chini Ofisi ya Makamu wa Pili wa Rais. Aidha, baada ya Muungano wa Tanganyika na Zanzibar, mwaka 1964 hadi mwishoni mwa mwaka 2004, Serikali ya Mapinduzi ya Zanzibar ilikuwa ikitumia Bendera ya Jamhuri ya Muungano wa Tanzania kwa matumizi mbalimbali ya Serikali.

### **Mheshimiwa Spika,**

Baada ya Serikali ya Mapinduzi ya Zanzibar kuona umuhimu wa kuwa na Bendera yake yenyewe, ilitunga Sheria ya Baendera Nam. 12 ya mwaka 2004

ambayo ilianza kutumika mwaka huo huo baada ya kupitishwa na Baraza la Wawakilishi na kuidhinishwa na Rais wa Zanzibar na Mwenyekiti wa Baraza la Mapinduzi. Tangu ilipoanzishwa mwaka 2004 hadi hivi sasa, Sheria hiyo inasimamiwa na Ofisi ya Rais, Tawala za Mikoa, Serikali za Mitaa na Idara Maalum za Serikali ya Mapinduzi ya Zanzibar.

**Mheshimiwa Spika,**

Wimbo wa Taifa wa Zanzibar unatumika bila ya kuwa na muongozo wa kisheria unaoelekeza namna bora na sahihi ya matumizi yake na hivyo kukosa sehemu mahususi ya kufanya rejea iwapo kutatokea tatizo.

**Mheshimiwa Spika,**

Baada ya Serikali kufanya mapitio ya Sheria za Nchi mbalimbali zenye mazingira yanayofanana na ya kwetu kama vile Seychelles, imebainika kwamba utambulisho wa alama za nchi ikiwa ni pamoja na Bendera ya Nchi, Nembo ya Serikali na Wimbo wa Taifa umeanzishwa na kusimamiwa na Sheria moja.

### **3.0 UMUHIMU WA MSWADA HUU WA SHERIA**

**Mheshimiwa Spika,**

Kutokana na kasoro zilizobainika katika muonekano na matumizi ya Bendera ya Zanzibar, Nembo ya Serikali na Wimbo wa Taifa, imeonekana kuna haja na umuhimu mkubwa wa kuwepo Sheria itakayoainisha utaratibu wa muonekano na matumizi sahihi ya alama hizo za Taifa.

**Mheshimiwa Spika,**

Miongoni mwa mwa kasoro hizo ni :

- a. Kuwepo kwa Sheria mbili tofauti zinazosimamia alama muhimu za Taifa na kusimamiwa na mamlaka tofauti.

- b. Kuwepo kwa Wimbo wa Taifa ambao hauna maelekezo ya kisheria yanayoulinda katika hali zote.
- c. Kutokuwepo kwa maelekezo ya kisheria juu ya mchanganyo wa rangi za Bendera na Nembo ambako kunapelekea kuwepo kwa Bendera na Nembo ya Serikali zenye mchanganyo tofauti wa rangi.
- d. Kutokuwepo kwa maelekezo ya kisheria juu ya matumizi sahihi ya Bendera, Nembo na Wimbo wa Taifa.
- e. Kutokuwepo na mfumo wa kisheria wa makosa na adhabu yanayosimamia utekelezaji wa Sheria ya Bendera na Sheria ya Nembo ya Taifa.

**Mheshimiwa Spika,**

Hivyo, Mswada huu wa Sheria pia ni muhimu kwa kuwa umeweka utaratibu mzuri zaidi wa kisheria wa kutengeneza na kutumia kwa usahihi Bendera ya Zanzibar, Nembo ya Serikali na Wimbo wa Taifa wa Zanzibar.

**4.0 SEHEMU KUU ZA MUSWADA HUU**

**Mheshimiwa Spika,**

Mswada huu umegawika katika sehemu kuu tatu kama ifuatavyo:-

- i. **Sehemu ya Kwanza** ambayo inahusika na utambuliso wa jina fupi la Sheria, tarehe ya kuanza kutumika na ufafanuzi wa baadhi ya maneno yaliyotumika katika Mswada huu wa Sheria.
- ii. **Sehemu ya Pili** ambayo inaelezea Bendera ya Zanzibar, Nembo ya Serikali na Wimbo wa Taifa wa Zanzibar pamoja na matumizi yinayofa na matumizi haramu ya alama hizo za nchi. Aidha, sehemu hii inaelezea uwezo wa Waziri wa kutunga kanuni, kusamehe na kutoa adhabu.

- iii. **Sehemu ya Tatu** inayoelezea makosa , adhabu, kufuta na masamaha juu ya matumizi mabaya ya Sheria hii

## **5.0 MASUALA MUHIMU YALIYOZINGATIWA**

### **Mheshimiwa Spika,**

Ili kuwa na Sheria itakayokidhi mahitaji ya nchi yetu katika utengenezaji na matumizi ya alama hizi muhimu kwa Taifa, mambo mbalimbali yamezingatiwa ikiwemo:

- a) Kuwepo kwa sheria moja inayosimamia alama za Taifa (Bendera ya Zanzibar, Nembo ya Serikali ya Mapinduzi ya Zanzibar na Wimbo wa Taifa wa Zanzibar).
- b) Kuwepo kwa vifungu vya Sheria vinavyoelekeza matumizi sahihi ya Bendera ya Zanzibar, Nembo ya Serikali ya Mapinduzi ya Zanzibar na Wimbo wa Taifa wa Zanzibar.
- c) Kuwepo uwezo wa Waziri anayehusika na kutunga Kanuni zitakazosimamia alama hizi za Taifa.
- d) Kuwepo vifungu vya makosa na adhabu kwa watakaokwenda kinyume na Sheria inayopendekezwakuanzishwa.
- e) Kuwepo kwa jadweli/viambatanisho katika Sheria vinavyofafanua muundo na vipimo sahihi vya Bendera ya Zanzibar na ala (note) za Wimbo wa Taifa wa Zanzibar na Wimbo Maalum wa Mashujaa wa Zanzibar.

## **6.0 HITIMISHO**

### **Mheshimiwa Spika,**

Sasa naomba Kamati yako iujadili Mswada wa Kufuta Sheria ya Nembo ya Taifa Namba. 1 ya Mwaka 1985 na Sheria ya Bendera ya Zanzibar Nambari 12 ya Mwaka 2004 na Kutunga Sheria inayoweka masharti bora yanayohusiana na Bendera ya Zanzibar, Nembo ya Serikali na Wimbo wa Taifa wa Zanzibar na kushauri ipasavyo.

**Mheshimiwa Spika,** Naomba kuwasilisha

---

**(Mohamed A. Mohamed)**  
**WAZIRI WA NCHI**  
**OFISI YA MAKAMU WA PILI WA RAIS**  
**ZANZIBAR**